

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијси савјет

**Zaključak o
obustavljanu postupka
Zahtjev za pokretanje postupka privrednog subjekta
„Centrotrans – Eurolines“ d.d. Sarajevo protiv Općine Breza i privrednog subjekta
„Ljaljić Turs“ d.o.o. Čelić**

**Sarajevo,
decembar 2013. godine**



Broj: 06-26-3-019-34-II/13
Sarajevo, 16. decembar 2013. godine

Na osnovu člana 25. stav (1) tačka e), člana 42. stav (2) Zakona o konkurenciji («Službeni glasnik BiH», br. 48/05, 76/07 i 80/09), te člana 122. stav (2) i člana 123. stav (1) Zakona o upravnom postupku («Službeni glasnik BiH», br. 29/02, 12/04, 88/07, 93/09, i 41/13), u postupku pokrenutom po Zahtjevu za pokretanje postupka privrednog subjekta „Centrotrans - Eurolines“ d.d. Sarajevo, Kurta Schorka 14, 71000 Sarajevo, protiv privrednog subjekta „LJALJIĆ TURS“ d.o.o. za saobraćaj i trgovinu Čelić, Ekrema Agića 113, 75246 Čelić i Općine Breza, Bogumilska 1, 71370 Breza, radi utvrđivanja zabranjenog sporazuma, Konkurencijsko vijeće Bosne i Hercegovine, na 76. (sedamdesetšestoj) sjednici održanoj dana 16. decembra 2013. godine, donijelo je

Zaključak **o obustavljanju postupka**

- (1) Obustavlja se postupak pokrenut po Zahtjevu za pokretanje postupka privrednog subjekta „Centrotrans – Eurolines“ d.d. Sarajevo, Kurta Schorka 14, 71000 Sarajevo, protiv privrednog subjekta „LJALJIĆ TURS“ d.o.o. za saobraćaj i trgovinu Čelić, Ekrema Agića 113, 75246 Čelić i Općine Breza, Bogumilska 1, 71370 Breza, zbog odustajanja Podnosioca zahtjeva - privrednog subjekta „Centrotrans - Eurolines“ d.d. Sarajevo, Kurta Schorka 14, 71000 Sarajevo.
- (2) Ovaj Zaključak će biti objavljen u Službenom glasniku BiH, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je zaprimilo, dana 12. avgusta 2013. godine pod brojem: 06-26-3-019-II/13, Zahtjev za pokretanje postupka (u daljem tekstu: Zahtjev) privrednog subjekta Centrotrans - Eurolines d.d Sarajevo, Kurta Schorka 14., 71000 Sarajevo (u daljem tekstu: „Centrotrans“ ili Podnosilac zahtjeva) za preispitivanje Ugovora o subvencionisanju prevoza učenika Opće gimnazije „Muhsin Rizvić“ i Mješovite srednje škole „Mehmedalija - Mak Dizdar“ iz Breze, sklopljenog između Općine Breza, Bogumilska 1, 71370 Breza (u daljem tekstu: Općina Breza) i privrednog subjekta „LJALJIĆ TURS“ d.o.o. za saobraćaj i trgovinu Čelić, Ekrema Agića 113, 75246 Čelić (u daljem tekstu: „LJALJIĆ TURS“) radi utvrđivanja postojanja zabranjenog sporazuma, iz člana 4. stav (1) Zakona o konkurenciji (u daljem tekstu: Zakon).

Uvidom u podneseni Zahtjev, Konkurencijsko vijeće je utvrdilo da isti nije kompletan, u smislu člana 28. Zakona, te je zatražilo dopunu istoga (preciziranje pravnog osnova i protiv kojih stranaka se zahtjev podnosi), u smislu člana 31. stav (1) Zakona, aktom broj: 06-26-3-019-1-II/13 dana 12. avgusta 2013. godine, te uplatu administrativne takse, u smislu člana 2. tarifni broj 106. stav (1) tačka f) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», br. 30/06 i 18/11).

Podnosilac zahtjeva u odobrenom vremenskom roku je dostavio tražene podatke i dokumentaciju, podneskom broj: 06-26-3-019-2-II/12 dana 19. avgusta 2013. godine.

U dopuni Zahtjeva, Podnosilac zahtjeva je precizirao da se Zahtjev pokreće protiv privrednog subjekta „LJALJIĆ TURS“ i Općine Breza, te precizirao da se Zahtjev odnosi na utvrđivanje postojanja zabranjenog sporazuma, iz člana 4. stav (1) tačke b) Zakona.

Kompletiranjem Zahtjeva, Konkurencijsko vijeće je Podnosiocu zahtjeva izdalo Potvrdu o prijemu kompletnog i urednog Zahtjeva, u smislu člana 28. stav (3) Zakona, broj: 06-26-3-019-3-II/13 dana 25. septembra 2013. godine.

1. Stranke u postupku

Stranke u postupku su privredni subjekt „Centrotrans - Eurolines“ d.d. Sarajevo, Kurta Schorka 14, 71000 Sarajevo, Općina Breza, Bogumilska 1, 71370 Breza i privredni subjekt „LJALJIĆ TURS“ d.o.o. za saobraćaj i trgovinu Čelić, Ekrema Agića 113, 75246 Čelić.

1.1. Privredni subjekt „Centrotrans“

Privredni subjekt „Centrotrans - Eurolines“ d.d. Sarajevo, Kurta Schorka 14, 71000 Sarajevo, je registrovan u Općinskom sudu Sarajevo pod matičnim brojem: 65-01-0339-11 (stari broj: 1-1675) sa upisanim kapitalom od 8.512.210,00 KM, i sa 29,54% vlasničkih udjela privrednog subjekta Sejari d.o.o. Sarajevo, 16,0958% vlasničkih udjela fizičkog lica Safudina Čengić (Sarajevo) i 9,2317% vlasničkih udjela fizičkog lica Muhameda Šaćiragić (Sarajevo).

Pretežne registrovane djelatnosti privrednog subjekta „Centrotrans“ su pružanje usluga u međunarodnom, međugradskom, gradskom i prigradskom prevozu putnika.

Ukupan godišnji prihod privrednog subjekta „Centrotrans“ je iznosio 27.121.876,00 KM za 2012. godinu.

1.2. Općina Breza

Općina Breza, Bogumilska 1, 71370 Breza, je tijelo lokalne samouprave. Ukupan godišnji budžet Općine Breza je iznosio 3.404.700,00 KM za 2012. godinu.

1.3. Privredni subjekt „LJALJIĆ TURS“

Privredni subjekt „LJALJIĆ TURS“ d.o.o. za saobraćaj i trgovinu Čelić, Ekrema Agića 113, 75246 Čelić, je registrovan u Općinskom sudu u Tuzli, pod brojem: 1-6459 (JIB: 4209376960006), sa upisanim osnovnim kapitalom od 330.840,00 KM, i sa 100,0% vlasničkih udjela fizičkog lica Redžep Ljaljić (Ekrema Agića 113, 75246 Čelić).

Pretežne registrovane djelatnosti privrednog subjekta „LJALJIĆ TURS“ su pružanje usluga u međunarodnom, međugradskom, gradskom i prigradskom prevozu putnika.

Ukupan godišnji prihod privrednog subjekta „LJALJIĆ TURS“ za 2012. godinu iznosi 491.891,00 KM.

2. Pravni okvir predmetnog postupka

Konkurencijsko vijeće je tokom postupka primijenilo odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10) i odredbe Zakona o upravnom postupku («Službeni glasnik BiH», br. 29/02, 12/04, 88/07 i 93/09), u smislu člana 26. Zakona.

3. Postupak po Zahtjevu za pokretanje postupka

Kao razloge za podnošenje Zahtjeva Podnosilac zahtjeva, u bitnom iznosi:

- da su dana 22. jula 2013. godine zaprimili Obavijest Federalne inspekcije o inspekcijskom nadzoru izvršenom od Kantonalne uprave za inspekcijske poslove Zeničko – dobojskog kantona u kojem je konstatovano da privredni subjekt „LJALJIĆ TURS“ obavlja prevoz učenika /učenica srednjih škola na prostoru Općine Breza na osnovu Ugovora o subvencionisanju prevoza učenika Opće gimnazije „Muhsin Rizvić“ i Mješovite srednje škole „Mehmedalija – Mak Dizdar“ iz Breze, sklopljenog dana 18. marta 2013. godine (u daljem tekstu: Ugovor);
- da su od Općine Breza dobili informaciju da je raspisala poziv za usklađivanje i registraciju redova vožnje;
- da je uvidom u predmetni Ugovor utvrđeno da Općina Breza nije raspisala javni tender za dodjelu predmetnog Ugovora, iako je bila obavezna u skladu sa odredbama Zakona o javnim nabavkama, budući da se radi o novcu koji se isplaćuje iz budžeta privatnom privrednom subjektu;
- da je Općina Breza postupila suprotno zakonu i zaključivanjem predmetnog Ugovora omogućila privrednom subjektu „LJALJIĆ TURS“ nelegalno sticanje finansijske dobiti, i da ovakvo postupanje stvara štetu zakonitom poslovanju privrednog subjekta „Centrotrans“.
- da predmetni Ugovor ima određeni broj nedostataka, jer ne sadrži obavezne elemente kao kao što su pravni osnov za zaključivanje ugovora (javni poziv - tender), nema predmeta Ugovora, relacije ugovorenog prevoza (i broj učenika /učenica), cijenu ugovornog prevoza kao i druge nepravilnosti (npr. nadležni sud za rješavanje sporova treba biti sud u Zenici a ne u Tuzli);
- da je privredni subjekt „Centrotrans“ u skladu sa zakonom na tenderu dobio pravo prevoza učenika /učenica osnovnih škola i ima registrovane redove vožnje na području Općine Breza, dok privredni subjekt „LJALJIĆ TURS“ nema registrovanih redova vožnje na području općine Breza (te nema pravni osnov prevoza na području Općine Breza).

Na osnovu iznesenoga, Podnosilac zahtjeva smatra da su privredni subjekt „LJALJIĆ TURS“ i Općina Breza zaključili zabranjeni sporazum, iz člana 4. stav (1) tačke b) Zakona, te traži da Konkurencijsko vijeće donese odluku koja će onemogućiti ovakvo dalje djelovanje, te poništi nezakoniti predmetni Ugovor.

Konkurencijsko vijeće je ocijenilo da bez provođenja postupka nije moguće utvrditi postojanje povreda Zakona navedenih u Zahtjevu, te je u smislu člana 32. stav (2) Zakona, donijelo Zaključak o pokretanju postupka, broj: 06-26-3-019-5-II/13 (u daljem tekstu: Zaključak), dana 25. septembra 2013. godine.

Konkurencijsko vijeće je dostavilo, u skladu sa članom 33. stav (1) Zakona, Zahtjev i Zaključak na očitovanje Općini Breza - aktom broj: 06-26-3-019-11-II/13 dana 26. septembra 2013. godine, privrednom subjektu „LJALJIĆ TURS“ - aktom broj: 06-26-3-019-13-II/13 dana 26. septembra 2013. godine, i privrednom subjektu „Centrotrans“ - aktom broj: 06-26-3-019-9-II/13 dana 26. septembra 2013. godine (sa zahtjevom za dodatnom dokumentacijom) .

Privredni subjekt „Centrotrans“ je dostavio dio tražene dokumentacije podneskom, zaprimljenim pod brojem: 06-26-3-019-14-II/13 dana 14. oktobra 2013. godine, te je Konkurencijsko vijeće zatražilo aktom broj: 26-3-019-15-II/13 dana 15. oktobra 2013. godine

dostavljanje kompletne dokumentacije, koju je isti dostavio podneskom zaprimljenim pod brojem: 26-3-019-21-II/13 dana 25. oktobra 2013. godine.

Privredni subjekt „LJALJIĆ TURS“ je dostavio očitovanje, kao i dio tražene dokumentacije, u skladu sa članom 33. stav (3) Zakona, podneskom zaprimljenim pod brojem: 06-26-3-019-12-II/13 dana 7. oktobra 2013. godine, te je Konkurencijsko vijeće zatražilo aktom broj: 06-26-3-019-13-II/13 dana 11. oktobra 2013. godine, dostavljanje preostale dokumentacije, a koju je privredni subjekt „LJALJIĆ TURS“ dostavio, podneskom broj: 26-3-019-16-II/13 dana 16. oktobra 2013. godine, u kojem osporava osnovanost Zahtjeva, iznoseći:

- da je Zaključkom Općine Breza broj: 01/2-14-540/2013 od dana 7. marta 2013. godine određen za prevoznika učenika /učenica Opće gimnazije „Muhsin Rizvić“ i Mješovite srednje škole „Mehmedalija - Mak Dizdar“ iz Breze, koji koriste javni prevoz za dolazak i odlazak u /iz škole (od dana 1. marta 2013. godine) i da će se izvršiti uplata subvencije u iznosu od 50,0% cijene mjesečne karte;
- da je na osnovu predmetnoga Zaključka sklopljen predmetni Ugovor, i da je isplata prevoza izvršena na osnovu dostavljenih spiskova učenika /učenica navedenih srednjih škola;
- da imaju sklopljen Ugovor o prevozu učenika osnovnog obrazovanja za školsku 2012. /2013. godinu sa JU OŠ „Safet-beg Bašagić broj: 03-185/13 od dana 28. marta 2013. godine, odnosno Aneks na predmetni Ugovor o prevozu učenika osnovnog obrazovanja za školsku 2012. /2013. godinu, odnosno da imaju sklopljen Ugovor o prevozu učenika /učenica u II polugodištu školske 2012. /2013. godine sa JU OŠ „Enver Čolaković“ od dana 18. januara 2013. godine, te slijedom iznesenoga nisu tačni navodi Podnosioca zahtjeva oko prevoza učenika /učenica;
- da nije tačno da je privredni subjekt „Centrotrans“ ugrožen od „nelojalnog“ djelovanja privrednog subjekta „LJALJIĆ TURS“, jer isti posluje legalno i u skladu s propisima;
- da predmetni Ugovor za novu školsku 2013. /2014. godine ne posjeduju, jer je povučen od Općine Breza radi tehničke greške u tipkanju, te je isti Općina Breza nakon utvrđivanja greške proglasila nevažećim;
- da je Općina Breza prvi put raspisala javni poziv za usaglašavanje općinskih linija za 2013. /2016. i da su se prijavili privredni subjekt „LJALJIĆ TURS“ i privredni subjekt „Centrotrans“ i da još nije završena procedura izbora.

Općina Breza je dostavila očitovanje, kao i dio tražene dokumentacije, u skladu sa članom 33. stav (3) Zakona, podneskom zaprimljenim pod brojem: 06-26-3-019-17-II/13 dana 21. oktobra 2013. godine, u kojem u potpunosti osporava osnovanost Zahtjeva, iznoseći:

- da Općina Breza nema uspostavljen linijski prevoz putnika na svome području i da je tek ove godine prvi put raspisala javni poziv, dana 1. jula 2013. godine, za usklađivanje redova vožnje, a koji treba biti završen dana 24. oktobra 2013. godine, te da su netačni navodi Podnosioca zahtjeva da je imao utvrđene redove vožnje na području Općine Breza;
- da su se Opća gimnazija „Muhsin Rizvić“ i Mješovita srednja škola „Mehmedalija - Mak Dizdar“ iz Breze, obratile općinskom načelniku sa zahtjevom za rješavanje problema prevoza učenika /učenica koji imaju prebivalište u mjestima Vijesolici, Vardišta, Orahovo, Slivno, Trtorici, Opreč i Bukovik, i koji su od centra Općine Breza udaljeni više od 5 kilometara;

- da su se predmetne škole obratile početkom marta 2013. godine, te je bilo neophodno provesti hitni postupak nabavke usluga prevoza učenika /učenica;
- da je najprihvatljivije i najefikasnije rješenje navedenog problema bilo prihvaćanje prevoznika koji je već saobraćao na navedenim relacijama, te je sa privrednim subjektom „LJALJIĆ TURS sklopljen Ugovor dana 18. marta 2013. godine (broj: 37/13) za školsku 2012. /2013. godinu, odnosno za 4 mjeseca te školske godine (u kojem je greškom umjesto 2012. /2013. navedena školska 2013./2014. godina);
- da je Sporazum o raskidu Ugovora, sklopljen dana 20. jula 2013. godine između Općine Breza i privrednog subjekta „LJALJIĆ TURS“.
- da je neosporno učinjena pogreška, ali da je ista neznatna u odnosu na cilj postignut sklapanjem predmetnoga Ugovora, kojim je u kratkom roku rješen problem prevoza učenika /učenica srednjih škola na području Općine Breza.

Konkurencijsko vijeće je zatražilo od Općine Breza, aktom broj: 06-26-3-019-18-II/13 dana 22. oktobra 2013. godine dostavljanje kompletne dokumentacije, kao i dodatna pojašnjenja procedure sklapanja predmetnoga Ugovora, koja je dostavila traženu dokumentaciju podneskom broj: 06-26-3-019-23-II/13 dana 1. novembra 2013. godine, iznoseći:

- da ranijih godina nisu sklapali ugovore koji su se odnosili na prevoz učenika /učenica u srednjim školama na području Općine Breza;
- da su se pri sklapanju predmetnoga Ugovora rukovodili **činjenicom** da su ostala tri mjeseca do kraja školske godine i da ugovorne finansijske obaveze neće preći iznos za koji je utvrđena mogućnost zaključivanja direktnog sporazuma;
- da postoje dva Ugovora sklopljena između Općine Breza i privrednog subjekta „LJALJIĆ TURS“, u jednom u tački 7. stoji da se odnosi na školsku 2013./2014. godinu, a u drugom da se odnosi na školsku 2013. godinu;
- da se radi o formalnoj tehničkoj greški u Ugovorima, a to potvrđuje da su oba zavedena pod istim brojem: 01/2-05-663/13 i brojem: 37/13 dana 18. marta 2013. godine;
- da su Sporazumom o raskidu predmetnoga Ugovora raskinuta oba navedena predmetna Ugovora (za školsku 2013./2014. godinu i za školsku 2013. godinu).

Konkurencijsko vijeće je dostavilo očitovanje Općine Breza privrednom subjektu „LJALJIĆ TURS“, aktom broj: 06-26-3-019-19-II/13 dana 22. oktobra 2013. godine, na koji je isti dostavio odgovor, podneskom broj: 06-26-3-019-22-II/13 dana 29. oktobra 2013. godine, u kome je u bitnom iznio:

- da su pravilno postupili u saradnji sa Općinom Breza oko prevoza učenika /učenica jer su već vršili prevoz učenika osnovnih škola na području Općine Breza, te su nastavili i prevoz učenika /učenica na osnovu sklopljenog Ugovora;
- da nije bilo linijskog prevoza putnika na području Općine Breza, te da je radi toga ista raspisala javni poziv za usklađivanje redova vožne, koji je okončan dana 24. oktobra 2013. godine.

Također, Konkurencijsko vijeće je dostavilo očitovanje Općine Breza privrednom subjektu „Centrotrans“ aktom broj: 06-26-3-019-20-II/13 dana 25. oktobra 2013. godine, na koji isti nije dostavio komentar.

Privredni subjekt „Centrotrans“ je dostavio odgovor na očitovanje privrednog subjekta „LJALJIĆ TURS“, podneskom broj: 06-26-3-019-21-II/13 zaprimljenim dana 25. Oktobra 2013. godine, u kojem iznosi:

- da je Općina Breza donijela Zaključak broj: 01/2-14-540/2013 dana 7. marta 2013. godine, kojim je izvršena uplata privrednom subjektu „LJALJIĆ TURS“ u iznosu od 50,0% cijene mjesečne karte (za učenike /učenice srednjih škola sa područja Općine Breza koji koriste javni prevoz za dolazak /odlazak u /iz škole), te je na osnovu Zaključka sklopljen i predmetni Ugovor;
- da je Općina Breza bez provođenja tendera i propisane procedure, utvrđene u Zakonu o javnim nabavkama, donijela Zaključak i sklopila predmetni Ugovor, te je na taj način narušila konkurenciju na relevantnom tržištu, stavljajući u povoljan položaj privredni subjekt „LJALJIĆ TURS“ u odnosu na ostale prevoznike jer je istim onemogućeno učestvovanje u prevozu učenika /učenica srednjih škola na području Općine Breza;
- da Ugovor nije poništen radi tehničke greške već je Općini Breza postalo jasno da je isti nezakonit.

4. Usmena rasprava

Budući da se radi o postupku sa strankama sa suprotnim interesima Konkurencijsko vijeće, u skladu sa članom 39. Zakona, je zakazalo usmenu raspravu, dana 19. novembra 2013. godine (poziv dostavljen privrednom subjektu „Centrotrans“ aktom broj: 06-26-3-019-24-II/13 dana 5. novembra 2013. godine, privrednom subjektu „LJALJIĆ TURS“ aktom broj: 06-26-3-019-25-II/13 dana 5. novembra 2013. godine i Općini Breza aktom broj: 06-26-3-019-26-II/13 dana 5. novembra 2013. godine).

Usmenu raspravu zakazanu za dan 19. novembra 2013. godine Konkurencijsko vijeće je odgodilo na zahtjev Općine Breza (podnesak zaprimljen pod brojem: 06-26-3-019-24-II/13 dana 15. novembra 2013. godine), te je zakazana za dan 27. novembra 2013. godine (poziv dostavljen privrednom subjektu „Centrotrans“ aktom broj: 06-26-3-019-28-II/13 dana 18. novembra 2013. godine, Općini Breza aktom broj: 06-26-3-019-29-II/13 dana 18. novembra 2013. godine i privrednom subjektu „LJALJIĆ TURS“ aktom broj: 06-26-3-019-30-II/13 dana 18. novembra 2013. godine).

Na usmenoj raspravi održanoj u prostoru Konkurencijskog vijeća su prisustvovali ovlašteni zastupnici svih stranaka u postupku.

Zastupnik privrednog subjekta „Centrotrans“ se izjasnio na zapisnik da odustaje od Zahtjeva, navodeći „*uvidom u podnesak koji je dostavila Općina Breza od dana 18. oktobra 2013. godine Podnosilac zahtjeva je utvrdio da je Općina Breza uvidjela svoju pogrešku te sporne sporazume raskinula sa danom 30. juli 2013. godine. Isto činjenično stanje proizilazi iz podneska koji je dostavio privredni subjekt „LJALJIĆ TURS“. Obzirom da sporni sporazumi ne proizvode pravno dejstvo Podnosilac zahtjeva je odlučio povući svoju prijavu.*“

Također, zakonski zastupnici ostalih stranaka u postupku (Općine Breza i privrednog subjekta „LJALJIĆ TURS“) su se složili sa odustajanjem od daljeg postupka (Zapisnik s usmene rasprave broj: 06-26-3-019-33-II/13 od dana 27. novembra 2013. godine).

Konkurencijsko vijeće je donijelo predmetni Zaključak o obustavljanju postupka, u smislu člana 122. stav (2) Zakona o upravnom postupku koji glasi „*Kad je postupak pokrenut po zahtjevu stranke, a stranka odustane od svoga zahtjeva, tijelo koji vodi postupak donijet će zaključak kojim se postupak obustavlja. O tome će biti obaviještena protivna stranka, ako je ima*“, te člana 123. stav (1) Zakona o upravnom postupku koji glasi „*Stranka odustaje od*

svog zahtjeva podnošenjem pismene izjave koju daje tijelu koji vodi postupak ili usmeno na zapisnik. Dok tijelo koje vodi postupak ne donese zaključak o obustavljanju postupka i ne dostavi ga stranci, stranka može opozvati svoje odustajnje od zahtjeva. “,

Stranke u postupku nisu dostavile troškove postupka, u skladu sa članom 105. stav (4) Zakona o upravnom postupku.

Na osnovu navedenog Konkurencijsko vijeće je odlučilo kao u dispozitivu ovoga Zaključka.

Konkurencijsko vijeće neće nastaviti postupak po službenoj dužnosti, radi utvrđivanja zabranjenog sporazuma, iz člana 4. stav (1) Zakona, jer ne postoji javni interes, u smislu člana 122. stav (3) Zakona o upravnom postupku.

5. Administrativna taksa

Na ovaj Zaključak Podnosilac zahtjeva, u skladu sa članom 2. Tarifni broj 108. stav (1) tačka b) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», br. 30/06 i 18/11) je obavezan platiti administrativnu taksu u iznosu od 500,00 KM u korist Budžeta institucija Bosne i Hercegovine.

6. Pouka o pravnom lijeku

Protiv ovog Zaključka nije dopuštena žalba.

Nezadovoljne strane mogu pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

Predsjednik

Gordan Raspudić